



JOHNNY TIENNE A.

ZÜRISCHNURRE

- 
- 01 **MEH LÄBE ALS DEZUE SÄGE** 4.16  
02 **WOTT EN KATER HA** 3.42  
03 **WIE GEIL ISCH DAS DÄNN** 4.22  
04 **EASY EASY EASY DEBIISY** 4.33  
05 **WEISCH NO, S'ERSCHTE MAL** 3.59  
06 **S'ISCH SCHO GUET** 2.53  
07 **AMBI AMBIVA AMBIVALÄNZ** 3.12  
08 **ES EI ODER AU ZWEI** 3.25  
09 **KEI AHNIG GHA VO DEM MA** 4.37  
10 **LASS LOS, HAU AB** 3.35  
11 **NÜT GÄGE MINI WUET** 4.21  
12 **STEILE GEILE SIECH** 3.36  
HOOCHIE COOCHIE MAN  
13 **S'CHRIBBLE ISCH WEG** 3.05  
THE THRILL IS GONE  
14 **IRGENDWO UF DIM WÄG** 3.26  
FARTHER UP THE ROAD  
15 **LEG DI HI, SPÄTZLI** 3.27  
LAY DOWN SALLY  
16 **S'GROSSE CHLII-ZÜRI** 3.49  
SWEET HOME CHICAGO

Neui eigeni Songs und  
ganz vilfältigi Stories

## **ZÜRISCHNURRE**

Plus e paar alti grossi  
Hits anders interpretiert

**JOHNNY TIENNE A.** GSANG UND GIIGE  
**UELI BLEULER** GITARRE UND GSANG  
**SEVERIN GRAF** BASS  
**STEE GFELLER** SCHLAGZÜÜG UND -WERK

**ALLI LYRIK VOM JOHNNY TIENNE A.**

**ALLI MUSIG VOM JOHNNY TIENNE A.  
UND VOM UELI BLEULER**  
PLUS VO ANDERE, DET WO'S STAHT

**ARRANGEMENTS VOM JOHNNY TIENNE A.  
UND UELI BLEULER UND DE GANZE BAND**

**PRODUZIERT VOM UELI BLEULER**

**UUFGNAH UND GMISCHT VOM  
MICHAEL DOLMETSCH**  
I SIM LITTLE MOUNTAIN STUDIO  
**GMASCHTERED VOM DAN SUTER**  
I SINERE ECHOCHAMBER

Design: Jean Etienne Aebi und  
Comuniq Zürich

Fotos: Niklaus Spoerri Zürich

Art Work und DTP: Mediafabrik AG Zürich

CD und Druck: DMS GmbH Berlin

Management: LM-Enterprises Zürich

[www.johnnytiennea.ch](http://www.johnnytiennea.ch)

Muesch wüsse, wie dä Vogel heisst, um en wunderschön z'finde?  
Wüsse, wohii dä Fluss flüsst, um dri z'gumpe?  
Muess es sii, wüerkli sii?

Tuesch google em Autor sini Vorgschicht, um z'verstah sini Poesie?  
Studiere de Farbuuftrag, um über es Bild z'debattiere?  
Muess es sii, wüerkli sii?

Chas dänn nöd, dänn nöd eifach soo sii?

**Meh Buuch, weniger Chopf isch agseit**  
**Meh Herz statt nu Wüsse isch agseit**  
**Meh Läbe als dezue säge**

Muesch mache e paar Millione, um dich riich z'fühle, isch es das?  
Mache di gross Karriere, um din eigne Chef z'sii,  
oder was? Muess es sii, wüerkli sii?

**MEH LÄBE ALS  
DEZUE SÄGE**

Bruchsch en Analyse vo dinere Chindheit, um dich  
chönne gern z'ha? E Garantie, dass es läbeslang duuret, bevor  
di verliebsch? Muess es sii, wüerkli sii?

Chas dänn nöd, dänn nöd eifach soo sii?

**Meh Buuch ...**

Müend er alles zerrede, widerchaue statt z'vertraue?  
Bruchts e Betriebsleitig fürs Läbe richtig z'läbe?  
Muess es sii, wüerkli sii?

Chas dänn nöd, dänn nöd eifach soo sii?

**Meh Buuch ...**

Ich gah id Beiz, gah id Chnelle, in Spunte und id Bar  
Schütte hindere, suuf druflos, kipp no eine, la nöd na  
Krieg kän Suff, kein Kater, bi nie zue, nie blau

Zerscht Prosecco, dänn Bier, Wisse und Rote zum Bödele  
Dänn mit Rum, Wodka, Whyskie und Tequilla wiiter lödele  
Doch kein Stei, kein Ballari, schaffes nöd, huäre blöd

**Wott en Kater ha, en Kater ha, wotti ha**  
**Wott vernagled sii, vernagled sii, wotti sii**  
**Blau und zue, blau und zue, äntli Rueh**

*Mann, häsch e Alkimmunität, hä? Voll krass!*  
*Wo gits diä Impfig, öppe bim Blaue Chrüüz?*  
*Häsch mer chli Chlotz defür – oder wotsch Lämpe?*  
*Chum, figg dich! Zieh Fäde, zisch ab*

**WOTT EN KATER HA**

Ich gah id Beiz, gah id Chnelle, in Spunte und  
id Bar | Schütte hindere, suuf druflos, kipp no eine, la nöd na  
Krieg kän Suff, kein Kater, bi nie zue, nie blau

Nächtelang Kampfsuufe mit de Jungs, schla mi meh als wacker  
Hopp und ex mit der Ex, mit de Neue en Absacker  
Keis Delirium, kein Hangover, nüt vo hackedicht

**Wott en Kater ha, en Kater ha, wotti ha**  
**Wott vernagled sii, vernagled sii, wotti sii**  
**Blau und zue, blau und zue, äntli Rueh**

Scho pränataldiagnostisch händs geseit:  
Dä Knirps hät Morbus Alzheimer  
Hät scho vergässe, dass er en Termin tuet ha  
A dem er de Uterus sötti verla

I de Schuel häter nur bestande  
Will er im Abschriibe es Genie isch gsii  
Und beidi Ärm als rezyklierbare Spick  
Voll mit Matheformle und Latschwörtli

Sini Bibliothek isch nöd chlii, häter alles gläse  
Aber was grad letschti Wuche, channer nöd säge  
Wänn anderi mit Zitate glänzed  
Erfindet er halt neu, wo passe chönnted

*Ich verrat eu jetzt das Rezäpt:*

*Häsch statt eme Gedächtnis e schwarzes Loch  
Bruchsch halt e blüendi farbigi Fantasie  
Lat di d'Erinnerig im Stich noch und noch  
Muesch nämli permanänt kreativ sii*

So hät er sich als sogenannt Kreative  
duregschummled e ganzes Läbe lang  
S'isch em chuum mal öpper uf d'Schlich cho  
Sin Sonderalz isch em beschtens bicho

Uswändig hät er natürl ni was chönne  
Tuusig Melodie, aber kän Songtext i de Birre  
Dä Film vo dem äh... mit deräh, weisch ja  
Wo hät gha ähm... dä Politheini zum Ma

Bim Memory stellt en de drüüjäährig Änkel  
Regelmässig sowas vo in Sänkel  
Es Mattschiibe-Dasii ohni Aber und Wänn  
Ächt jetz, wie geil isch das dänn?

## WIE GEIL ISCH DAS DÄNN

*Kän Witz, de Song isch es  
Coming-out. Er nimmt mini  
Läbesgeschichte ironisch uf  
d'Schippe. Übertriebt echli,  
isch aber nie und nimmer  
pietätlos gmeint. Sött das  
öpper trotzdem so empfinde,  
entschuldig ich mich defür.*

Gurkts di a, lüütet keine a, bisch am A- schlag, oh Ma  
Laufts nu flau, elleige blau, scho chli en Gau, oh Frau

Mässig lässig, eher stressig, macht di hässig, gaht nöd verbii  
Eifach immer i dim Zimmer, nie und nimmer chas das sy

Mach uf Macho, Bro, id Stiletto, Slay, und ab uf d'Party  
Aber ja kän Bittibättiblick, cool isch d'Rule, wotsch debii sy

**Easy debii sy, easy debii sy, easy easy, easy debii sy**  
**Locker vom Hocker, locker vom Hocker, locker locker, locker vom Hocker**  
**Acho und dracho, acho und dracho, acho acho, acho und dracho**

Spill Giige, iss Fiige, Hummer gege Chummer, Tango mit Mango  
D'Mütze id Pfütze, Döner als Versöhner, Chillout ohni Maut

Hör uf Angela merkle, fang a Meghan markle, losla  
Covidi covida coronara jetz mal hinter dir la

Sorg für Gwitter uf Twitter, au Müüs händ mal Lüüs  
Leg uf statt Rock nuno Barock, no risk no fun, also ran

**Easy debii sy ...**

Sorry Lori, hola Lola, riise Krise eifach cacle  
Relaxe und rolexe isch im Fall voll toll

Schafseckel mit irem Chrüsümüsi ghört eis uf de Teckel, äxgüsi  
Ihr sind kein Fake, kän Look-alike, schnalled ers, ihr gfalled eus

Im Wald ischs chalt, im Bett ischs nett, sich ha isch 1a  
Kän Mond ohni Sunne, guet isch öpper ume, chli Lämpe chame ja ha

**Easy debii sy ...**

**EASY EASY**  
**EASY DEBIISY**

*Weisch no? Weisch no din erschte  
Schuelschatz? De erschti Kuss hinter em Bus?  
De erschti Fuessbölle, di erschit kaputti Schiibe?  
Di erschti Zigi am Silväster mit em Sigi?  
Di erschte Bildli und Gedichtli, s'Letschte!  
Weisch no?*

Zum erschtemal e Party gschmisse i de dritte Klass  
Bim Beck für alli mit Glace uf d'Rächnig vo de Ma  
Lampe dehei dänn voll krass

Zum erschtemal im lishockeygoal, ohni sonen Helm  
Checksch de Puck, isch mängisch e chli tumm  
Mis Nasebei hüt no chrumm

Zum erschtemal Schnägge gässe, will ich Depp  
Ha Escargots verwächslet mit Escalope  
Momoll Bubi: ächt top!

**Nur s'erschte Mal isch s'erschte Mal**  
**Aber s'erschte Mal isch nur s'erschte Mal**  
**Nur s'erschte Mal isch s'erschte Mal**  
**Aber s'erschte Mal isch nur s'erschte Mal**

*Weisch no? Weisch no dönn als Teenie?  
Din erschte Suff, im Latsch en Totsch?  
De erschti Grunge, Action mit Punch?  
De erschti schüüchi Sex nach em Kino Rex?  
S'erschte Gras mit de Marihuana-Nana?  
Weisch no?*

Zum erschtemal on Stage mite E-Gitarre  
Totale Stromuusfall, Riesepanne  
Oh Boy, ab id Pfanne

## **WEISCH NO, S'ERSCHTE MAL**

Zum erschtemal en eigene Chlapf, es Cabrio  
Powerslide uf em Pass isch em nöd bichoo  
Totalschade, Abbruchwage

Zum erschtemal New York und grad alles checkt  
Nur isch de Cheese Cake kei Chäswälle gsii  
Det in little Italy

### **Nur s'erschte Mal ...**

*Weisch no? Weisch no din erschte Job?  
De erschti Lohn, de erschti Zoff mitem Chef?  
S'erschte eigene Flat, no ohni Bett und Cat?  
Di erschti Trännig, enttüscht Hoffnig?  
S'erschte Mini-Start-up, Mega-Fête im Pub?  
Weisch no?*

Zum erschtemal mite grosse Liebi uf d'Insle  
Wäg de Luftdüüse im Flug total stiife Hals, chli fies  
Doch sowas vo egal im Paradies

Zum erschtemal e Live-CD mit Jazz und Giige  
D'Mischpultlady chli e Pumpi, ich total suur  
Bruch e Kur mit Whyskie pur

Zum erschtemal es Baby, mannoma  
Da chunnsch neu uf d'Wält, s'Läbe fangt nomal a  
Windle wächsle, Papa! – Et Cetera...

### **Nur s'erschte Mal ...**

Nur bim Sterbe isch s'erschtemal au s'letschtemal  
Oder öppe nöd?



Du bisch wie du bisch  
Wirsch sii wie sii wirsch  
Jetz finds doch mal guet  
Nei, s'bruucht nöd gross Muet

Kein Schatte ohni Liecht  
Träne chasch au lache  
Ob d'Träum schwer oder liecht  
Immer Grund zum Uufwache

*En Hirsch isch kän Fisch, isch kän Kirsch, kän Tisch  
Es chunnt, ob bunt oder rund, so wies chunnt*

### Sii-ischoguet Sischoo-oguet

Ewigi Liebi hät es Änd  
S'wird eu z'äng i eure Wänd  
Kän Boge ohni Räge  
Am Schluss no en Säge

## S'ISCH SCHO GUET

Kei Nacht ohni Morge  
Sorge chasch entsorge  
Läse zwüsche de Ziile  
Statt Stress mal verwiile

*En Hirsch isch kän Fisch, isch kän Kirsch, kän Tisch  
Es chunnt, ob bunt oder rund, so wiäs chunnt*

### Sii-ischoguet Sischoo-oguet

Ich sing wieni sing  
Mache halt miis Ding  
Findets guet oder schlächt  
Isch mir so oder so rächt

**Ambi Ambi Ambiambiambiambi Ambiva-Ambivalänz  
Abstinänz, Resistänz, nüt chunnt i d'Chränz gege Ambivalänz  
Eloquänz, Essänz, Potänz, alles kä Konkurränz für d'Ambivalänz  
Quintessänz isch, gnüss in Permanänz Ambiva-Ambivalänz**

De Hans Dampf im Schnäggeleloch hät alles, was er will  
Und was er hät, das will er au, und was er will, das hät er au  
De Hans Dampf isch ambivalänt, hät alles, was er will

D'Marili, die Träumeri, weiss nie, was si söll  
Zu mir, zu dir, is Bett, uusgah, isch Jeans oder Mini besser fürs Karma  
D'Marili, nöd ambivalänt, weiss nie, was si söll

*Es Entweder-oder isch en Zwang und Fruscht  
Es Sowohl-als-au macht frei und Luscht*

S'isch ere alles eis Ding, ob i lach oder sing  
D'Sara staht uf Dramödie, Hassliäbi, Vegiburger,  
Melange de tout  
Hätt es Herzeli für mini Ironie, isch so wunderbar ambivalänt

S'isch em alles en Zwang, ob i bliib oder gang  
Für de Otto isch Lotto, Sushi und Bi, Dämmerig nüt als zwiespältig  
Hätt käs Gen für mis Multitasking, isch em halt zu ambivalänt

*Es Ja-aber isch e ständigi Blockade  
Es Warum-nöd? e schnälli Zielgerade*

**Ambi Ambi ...**

**AMBI AMBIVA  
AMBIVALÄNZ**

Mach es Ei oder au zwei für mich ellei  
Einerlei, sones Ei ischs Gäl vom Ei  
Mit sonem Ei bisch nüm ellei bi dir dehei

En Massai chunnt zu sim Schlangenei au ohni Stei  
Mit ume-eiere uf em i-Phone bisch no kein Hai  
En Griff a d'Ei-er macht di nonig zum geile Guy

Nüt als Wei-cheier bi de CI-A und FBI  
Eis as Bei, dene Tei-gaffe, bye-bye  
Uf Easy Ri-ders aber stönd Mei-tli nöd nu im Mai

Mit sim Ei häts de Kolumbus bracht uf d'Reih  
Villne Ei-dgenosse glingt nödemal es Spiegelei  
Nu Gackerei statt Ei-erlege so en Sei-ch

Bruch es Ei oder au zwei für mich ellei  
Will kän Brei, kei Arznei, will mis Ei  
Mit sonem Ei bisch nüm ellei bi dir dehei

**ES EI ODER  
AU ZWEI**



Warum grad dä mit dere, warum grad die mit dem  
oder au die mit dere, dä mit dem da?

Häsch di das au scho gfröget, die heissi Bohnestange  
grad mit dem dicke Chliine, oder dä Eierchopf mit dem  
Landei, was macht us dene zwei – es Paar und warum?

Gliichi Brülle, gliche Blick, di andre  
i ihrem Schmunzle, Runzle ein Look, ei Seel  
Gegesätz sind e Chillisosse, Übereinstimmig  
en Tranquilizer, und dänn gits no de Coup de Foudre  
Passiert ja villicht dir – au emal

**Häsch kei Ahnig gha, kei Ahnig gha vo dem Ma  
Jetz isch er da, dä Ma, da dä Ma muesch du ha  
Und er nöd gaga-ga, nöd gaga-ga, er seit ja**

Warum grad dä mit dere, warum grad die mit dem  
oder au die mit dere, dä mit dem da?

Was findet d’Nanas-Wiiber vo de Saint-Phall a dene  
Ratter-Maschine vom Tinguely so heiss, und erscht  
was dänn d’Melania – a dem Donald?

## KEI AHNIG GHA VO DEM MA


Mike Jagger und Keith Richard sind ei Symbiose,  
Gilbert und George ja wohl au  
Aber nöd gnuég, lug emal: Dä hät di gliichi Schnurre  
wi sini Bulldogge, die da di gliiche Auge wi  
ihre VW-Chäfer, oh ja – alles gits da

**Häsch kei Ahnig gha ...**

Warum brännt dä Bankboss dure mitere  
Drag-Queen und nöd de Eva?  
Sind Liebeswäg unergründlich, oder was isch d’Conclusio  
vo dere Volltexterei? Na ja, wer weiss, villicht isch  
alles nu Blabla – weisch aber ja:

**Häsch kei Ahnig gha, kei Ahnig gha vo dem Ma  
Jetz isch er da, dä Ma, da dä Ma will di ha  
Und du chli gaga-ga, chli gaga-ga, du seisch ja**

Häsch kei Ahnig gha





**Lass los, lass los, lass los, lass los**  
**Frög nüm, warum, und lass los**  
**Hau ab, hau ab, hau ab, hau ab**  
**Gibs uuf, mach Schluss und hau ab**

Verstahnes ja, känn eu ja, has ja gseh vo Afang a  
Schmätterling im Buch, en Schwarm vo buttergäle,  
pinkipinkipünktlete, zarte bi dir, bi ihm naja:  
So en walrossbullige, das wärs dänn au scho gsii

Nüt als Fuessball, Techno, Compigames, abhängen mite Jungs,  
und du, wo blibsch du?  
Diini Musig, dini Poesie, dini Traum?  
Hettisch es sölle, aber du du du du du häsch's  
nöd wahrha welle

**Gibs uuf, gibbs uuf, gibbs uuf, gibbs uuf**  
**Gsehs ii, chlämm ab und gibbs uuf**

Niemerd isch gschuld, nei, s'brucht immer zwei,  
häsch ad Liebi glaubt  
Au woner agfange händ eu z'versetze und z'verletze,  
häsch no gmeint:  
Inere offene Beziehig seig e chli Stress halt erlaubt

Bi ja nu en Fründ, aber das bini, und grad drum lügi eu nöd a  
Usse macheder no uf cool, aber drin isch alles fuul  
Checksch es jetz, au wänns hert isch, muesch es jetz siila

**Lass los, lass los, lass los, lass los**  
**Frög nüm, warum, und lass los**  
**Hau ab, hau ab, hau ab, hau ab**  
**Gibs uuf, mach Schluss und hau ab**

## LASS LOS, HAU AB

Mit e chli Musig drin  
à la Freddie Freeloader  
(Miles Davis)

Hey, El Gi Bi Ti Qiu | Hi, all Lives matter, got-it?  
Ho, all Religions too

Als Vice President lacht e People of Color Frau i de USA  
Ehe und Bälger für Homos, Outing isch in, Ghetto out  
Tierschutz für alli, für Veganer s'volle Menue, jaja

Das isch schomal en guete Afang | Ha aber halt doch no e Frag  
Was isch dänn mit euse Chind, was?

**Es git Züüg, wo für es High oder Down Sorge tuet**  
**Es git Schöns, es git Hässlichs, Freud und Leid, alles scho guet**  
**Es git aber nüt, nüt gäge mini Wuet**

30 Prozänt vo de Mänsche sind Chind | Händ kei Lobby,  
kei bewilligti Demo | Villi krieged nur uf de Grind

So en Knirps mit grosse Auge wett alles gseh, verstah,  
gernha | Aber was, wänn das sine Alte nu läschdig isch?  
Und er doch nöd nöd nöd wett, dass er ine wird  
weg gnah

De Grönemeyer hät mal gsunge | Sin Song Kinder an die Macht  
Käs Wunder, hät's nöd vill bracht **Es git Züüg ...**

So, mini Forderig isch die | Vorkurs und Diplom, wotsch Chind ha  
Suscht gits nämli gern es Drama

Chindswohl-Gricht, wo di Chliine immer händ rächt  
Für settig in Not und uf de Strass es Grundiikome yeahyeah  
Nu Vormünder, wo au händ en Vormund, nüt als gerächt

Jaja, strängt alles chli a | Naja, isch kän peppige Pop-Song  
Tja, chlämme jetz ab und gah **Es git Züüg ...**

## NÜT GÄGE MINI WUET

Mit u.a. eme Musig-  
motiv vo C-Jam-Blues  
(Duke Ellington)

E Roma seit minere Ma, bevor i bi da  
S'wird si es Buebli, es chäibe Tüüfeli  
D'Fraue, di Schöne, werded stöhne  
Und di ganzi Wält wüsse, was si nöd wott vermissee

**Aber jetz bin i da  
Alli wüessed ich bi da  
Bin en steile geile Siech  
Und alli wüessed ich bi da**

Ich ha en Chatztechnoche, es magischs Amulett  
Bin en Zauberzampano, bring di durenand  
Ha eu Girls, yeah, alli i de Hand  
Und di ganzi Wält findet das erst no nett

**Dänn jetz bin i da ...**

I de sibete Stund, am sibete Tag  
Vom sibete Monet, di sibe Döcker stuuned:  
Hät uu Glück gha, er isch scho da  
Hät scho sibe Lappe, mached ja kei Lämppe

**Dänn jetz isch er da  
Alli wüessed er isch da  
Isch en steile geile Siech  
Und alli wüessed er isch da**

## **STEILE GEILE SIECH**

Hoochie Coochie Man  
vom Willie Dixon

*Nach zwei musikalische Aleihe  
us em Jazz (bi mir in jedere  
Playlist de Fall) da no e Reihe  
vo Cover-Versione, die eigentli  
gar nöd planed gsii sind. Aber  
s'hät eifach huere Spass gmacht,  
die Blues-Monumänt zum erschte  
Mal ine Mundartfassig z'bringe.  
Die einte zimli nöch am Original,  
anderi völlig frei, au inhaltlich.*





S'Chribble isch weg (Baby)  
S'Chribble isch weg und futsch  
Du häsch es vermasset, Chätzli  
S'wird der no leid tue, dini Mätzli

D'Luft isch duss (Baby)  
D'Luft isch duss und Schluss  
Zwar bin i no am Läbe, schöni Frau  
Aber voll am Arsch, so en Gau

D'Musig isch uus (Baby)  
D'Musig isch uus und tot  
Gopfertelli, s'isch ja villicht guet eso  
Hueresiech, en andri wartet scho  
irgendwo

Jetzt bin i frei, frei, frei (Baby)  
Ich bin frei, bi din Zauber los  
Alles, was no bliibt, mini Liebe  
Isch, dass i dir alles Gueti wünsche,  
Baby

## S'CHRIBBLE ISCH WEG

The Thrill Is Gone  
vom Roy Hawkins  
und Rick Darnel

Irgendwo uf dim Wäg  
Öpper wirder wehtue wie jetz du mir  
Irgendwo uf dim Wäg, Baby  
Muesch nu warte, es passiert dir

Du wirsch ernte was du sähsch  
Das alte Sprichwort seits (oh) ja  
So wie du öpper verletzisch  
Genauso chunsch dänn du dra

Chasch scho lache, du Netti  
S'Brüele chunntänn scho no  
Irgendwo uf dim Wäg, Baby  
Findisch use es isch so

Irgendwo uf dim Wäg  
Du ellei und es chunnt d'Reui  
Wotsch dänn wider zugg zu mir  
Ha dänn aber halt e Neu

Wotsch dänn wider zugg zu mir  
Ha dänn aber halt e Neu

## IRGENDWO UF DIM WÄG

Farther Up The Road  
vom Don Robey  
und Joe M. Veasy

Es git nüt, wo falsch dra wär  
am Wunsch, dass du da blibsch bi mir  
Ich weiss, dass du muesch irgendwo hi,  
aber warum wotsch nöd echli dehei si da bi mir  
Und mi nüme verla

**Leg di hi, Spätzli, und chumm i mini Ärm**  
**Meinsch dänn nöd, du wetsch öpper zum schnurre ha?**  
**Leg di hi, Spätzli, kän Grund zum grad wider gah**  
**D'Nacht isch ewig lang, wänn i nöd chli mit dir rede cha**

Bisch mal en Hippie gsi  
Flower Power, Astrozauber, riise Liebi  
Doch dänn bisch abfloge, One-way-ticket  
Zum Glück wird echli vo dim Lache und  
Wüsse mir blibe  
Und mi nüme verla

**Leg di hi, Spätzli ...**

D'Sunne gaht no lang nöd uf,  
no lüchtet de Mond und d'Sterne, und ich weiss ja:  
De helli det obe bisch jetz du:  
min Stern im Himmel und Herz, tuet mer zuezwinkere  
Und mi nüme verla

**Leg di hi, Spätzli ...**

## **LEG DI HI, SPÄTZLI**

Lay Down Sally vom  
Eric Clapton und Kollege

**Chumm scho, Schnüge wotsch nöd ändli gah**  
**Chumm scho, Schnüge wotsch nöd ändli gah**  
**Hei a din alten Ort, s'grosse Chlii-Züri**

Eis und eis isch zwei, zwei und zwei isch vier  
S'Niederdörfli wartet, em Böög sis Chopfab-Bier  
Hey du, Schnüge wotsch nöd ändli gah  
Hei a din alten Ort, s'grosse Chlii-Züri

Drü und drü isch sächs, sächs und zwei isch acht  
D'Streetparade wummered, d'Herzbaragge lacht  
Hallo, Schnüge wotsch nöd ändli gah  
Hei a din alten Ort, s'grosse Chlii-Züri

Acht und zwei und zäh isch zwänzg comme il faut  
Petarderot de Letzigrund, im Zoo en neue Floh  
Mach scho, Schnüge wotsch nöd ändli cho  
Hei a din alten Ort, s'grosse Chlii-Züri

**Mach scho, Schnüge wotsch nöd ändli cho**  
**Mach scho, Schnüge wotsch nöd ändli cho**  
**Hei a din alten Ort, s'grosse Chlii-Züri**

Chumm scho

## **S'GROSSE CHLII-ZÜRI**

Sweet Home Chicago  
vom Robert Johnson



**Johnny Tienne A.**  
**Ueli Bleuler**  
**Severin Graf**  
**Stee Gfeller**